

游石籠記

王嚮

龍安自峻下東入其山躡浮雲而上之極十里有羣石環會突立石頂有雙瀑淙下有石澗廣六七尋傍無荒茅萑葦之穢而其水無泥沙皆清冷可啜游魚沈泳厯厯可見而水間之石或哮然如巖或剌然如日或偃然如槽或落然如孟端正瑩徹類非鑄鑿之能及凡若此行數十步卽至其所謂石籠者籠之狀類巨槽而圍圍斗壁下澗五丈會一澗之水而環之已卽復泄而爲澗前之巖者槽者孟者又紛羅錯列亦無苔蘚泥沙之穢焉由此少進而澗下之石乃坦然成盤縱數十尺盤之中直發小剛廣纔盈咫而一澗之水又悉流於盤之下其聲瓏瓏若雷窺其底廣深不可窮而水涓涓可愛熙甯九年余在龍安時與諸生尋泉流而得其處於是樂而忘歸焉夫天作而地藏之以遺其人者可謂至矣雖然惜其不出於通都大邑之郊而藏乎窮山絕壑之下而不爲好游而附勢者之所知也使當唐時爲柳宗元李愿等見之則其爲名也豈特石潭盤谷之比哉

道藏輯要

天下名山記
江西游石籠王

三

軫集三